

tenus de aidier ne de servir aucuns, qui ne seroit de ces presantes trues, se il ne le font de leur voluntei. (12) Et se aucuns signeurs, bonnes villes ou autres, qui seront de ces trues, avoient aucuns^a damaiges ou entroient en guerres dedens le pourpris de ces communes trues pour raixon des dite communes trues, nous lour devons estre aidans par sairement jusques a fin de guerre et quil soient restaublis de leur damaiges sens mal anging. (13) Saucuns faisoient ou avoient fait damaiges a aucuns dez signeurs auz bonnes villes ou a autres dedens ces communes trues, ou ne vouloient faire droit et painre droit, et li noef tesmoignoient, que lez dites communes trues an fussent brisiees ou caisseies, et il venoient ans villes ou en fermeteiz aipartenans a ces dites trues, li signeurs ou les bonnes villes lez doivent painre et tenir par sairement auci bien, com li tors et li damaiges fussent fais az signeurs ou az bonnes villes, aiprez ceu quil leur seroit denoncies par lez noef ou par la plus grant partie deaulz. (14) Et quicunques briserait ces trues ou feroit damage a ceaulz, qui sont appartenans a ces communes trues, cilz qui le soustainroit, recepteroit, concilleroit ou aideroit en dis ou ens fais, a celui ou a ceaulz, qui ceu feroient, sen puet on et doit painre enci com a celui meysme, qui le damage averoit fait. (15) Et toutes ces choses sommes nous tenus de aidier a faire par sairement en bonne foit sens mal enging; se aucuns avoient a dire ou a faire autrement, que a dessus nest escrit, fust pour dattes, pour heritaiges ou an autre maniere samblant ad ceu, il ne doivent dedens ces communes trues riens meffaire lun contre lautre, mais doivent tenir journeie ansamble et painre et faire droit lun lautre, ou il le doivent faire par droit et par raison¹, et ne pourront ne doveront mover guerre lun contre lautre; et se li uns vouloit guerroyer lautre, et cilz autres vouloit painre droit et faire droit devant lez noef ou la, ou il doveroit par raison, nous doveriens aidier celui, qui droit vouroit painre, contre celui, qui ne vouroit painre droit com dessus est dis. (16) Sus ces communes trues a cognostre sont eleu et estaublis noef persones. Cest a savoir depart nous roy desus dit Joffrois de Sairebruche; depart nous duc de Loherenne et marchis Jaques de Moncleir; depart nous conte de Bar Huars de Baffroimont; depart nous contes, gentilhommes et bonnes villes de leveschiet de Mes Jehans

a) 'aucuns' Or.

1) Hier schon endet die Abschrift von Schannat.